

Deklarasaun Politika Bankada PD
iha Diskusaun Generalidade Orsamentu Jeral 2013
Dili, 6 Fevreiro 2013

Exmo. Sr. Presidente do Parlamento Nacional no mesa tomak
Exmo. Sr. Primeiro Ministro
Maluk Deputadu sira
Membrus do Governu
Povo tomak

Bancada Parlamentar do Partido Democratico apresia tebes discusaun OGE/2013 nian nebe hatudu mai ita katak Timor-Leste tama ona iha kapitulu foun husi nia istoria politika. Durante debate ida ne'e ita la diskute ona kona ba konflitu, instabilidade, ka IDP's... maibe ita halo diskusaun kontrutivu kona ba substansia desenvolvimentu nasional, hodi konfronta ita ida-ida nia analize kona ba vizaun no konseitu iha perpektiva ekonomika, politika no sosial. Hanesan Timor Oan ita tenke orgulhu ho ita hotu nia maturidade hodi enfrenta desafiu foun Ukun Rasik ita nia Rai!

Exselencias

Ita mos tenki orgulho katak Timor-Leste bele hatudu ona exemplu de susesu ida iha resolusaun de konflitus. Tamba ne'e duni mak Komunidade Internasional fo ona fiar ba Timor Oan Ida atu chefia misaun importante ida hodi tulun buka dalan ba situasaun ida, nebe komplikadu tebes, nebe ita nia maun alin sira iha Guine-Bissau enfrenta dadauk iha sira nia vida umana no vida estadu iha tinan naruk nia laran.

Ho ita nia maturidade politika no kualidade lideransa nebe ita iha mak, agora dadaun, Ita prepara an hela atu tama ba ASEAN, hodi sai parte integral hosi komunidade ASEAN, iha ita nia rejiaun. Pasu konkretu hosi ita nia preparasaun mak Ita desenvolve dadauk projetu bot ida iha ita nia Kosta sul no mos, mega projectu ida atu hahu naran Zona Economica Especial Social e de Mercado iha Oecusse. Ne'e hatudu katak Timor-Leste loke an dadauk ona ba ita nia rejiaun hodi sai nudar odamata, ba CPLP no ba Mundu internacional.

Exselencia,

Partido Democratico konsidera demokrasia nudar meius ida, tamba Iha prosesu democratizasaun iha ita nia rai, ita tenki konsiente katak laiha inimigus maibe iha adversarius politikus, no ita hotu nudar parte integral hosi prosesu ne'e tomak. Ita nia funu nain sira hanorin ita katak ita mesak maun no alin, tamba ne'e mak iha funu laran, ita sempre bolu maun bot, bin no alin. Ho doutrina funu nain sira nian ne'e, mak to'o ona tempu ita, politiku sira tenke rona no respeita malu, hodi fanun ita nia konsensia, banune, bele fo hanoin ba malu, oinsa ita hadi'a povu no nasaun nia moris ba diak. Nune, dialogu sai nudar instrumentu efikaz liu, hodi halibur ukun sira iha prosesu demokratiku iha ita nia rai.

Maibe, ida ne'e la signifika atu hamate diferença de opinioens no espíritu kritiku ka debate nebe sai nudar pilar fundamental Parlamentu nian nudar fiskalizador, observador, no responsavel atu garante katak politikas governu nian adekuaudu duni ba prosesu desenvolvimentu ita nia nasaun no ita nia Povu nian.

Wainhira lider politiku sira iha rai ida ne'e, hahu lori malu hodi hakat ba kapitulu foun ida ne'e, konserteza, ita sei enfrenta desafius oi-oin, iha rai laran no mos husi rai liur. Dizafius hirak ne'e, sei mai hamutuk ho ita nia politika de abertura ba exterior nebe sei mosu ho nia natureza no riskus koleterais, hanesan trafiku oin-oin, prostituisaun, droga, enfim, crime organizadu oin-oin. Desafiu seluk maka ita sei enfrenta competisaun iha Mercado de trabalhu ho nasaun sira seluk.; ma jestaun, ma administrasaun bele lori ba aumentu da korupsiaun. Atu antisipa no kombate buat hirak ne'e, maka ita hotu nudar ukun nain tenki kombate ho firme no efikasiasa.

Buat sira ne'e hotu apresenta mos desafio bot ida mai ita iha Parlamentu Nasional nudar representantes Povu nian. Ita nia kna'ar maka garante katak Governu nia politikas no desempenho bele garante duni fortalecimento no profesionalismo ita nia forsa de seguransa nian, hodi ho sistema integradu ida bele kombate efikasmente crime oin-oin hanesan mensiona iha leten.

Ita tenke mos garante katak Governu nia politika sei resolve ita nia falta de rekursus humanus liu-liu rekursus teknikus iha areas hotu hotu hodi ita nia sidadaun sira bele mos compete iha merkadu de trabalhu.

Ita nia dever mos nudar representantes do Povu atu garante katak Governu iha jestaun finanseira ida ke efikaz no transparente hodi evita ma administrasaun no korupsiaun. Hodi nune osan nebe ita gasta tinan tinan bele iha impaktu ba Povu nia moris, nasaun nia desenvolvimentu no aban bainrua iha retornu ba jersaun tuir mai. Projetus hotu-hotu tenke iha fiskalizaun nebe diak no konsistente atu garante qualidade no tau atensaun maxima ba impaktu ambiental.

Atu hakat liu desafius nebe iha no garante susesu ba desenvolvimentu, no konsolidasaun husi ita nia demokrasia maka ita presiza servisu hamutuk, halo koperasaun diak ho forsa politikas no sosiais hotu nebe ita iha.

Mak ne'e deit Sr. Presidente intervensaun husi Bancada Demokratika, Hamutuk ita sei fiar an liu tan, hodi tane metin no si'an prinsipu kaer ukun rasik an no hari nasaun husi base.

OBRIGADA BARAK!